

आकाशवाणी

खबरां -----

1. सरकार नै इलेक्ट्रानिक्स उत्पादन दे बादे विकास लेई 22 जहार 919 करोड़ दी इक स्कीम मंजूर कीती। केंद्र सरकार नै अपने मुलाजमें लेई महंगाई भत्ते च 2 प्रतिशत दा कीता बादा।
2. प्रधानमंत्री नरेंद्र मोदी होरें आखेआ ऐ जे विदेश नीति हून इंडिया फर्स्ट मंत्री पर चला'रदी ऐ जेदे पर वैश्विक भविष्य निर्भर करदा ऐ।
3. म्यांमार च दो बड़े भूचाल आए, बेंगकॉक च बी झटके महसूस कीते गो। भारतीय एम्बेसीनै आपातकालीन नंबर जारी कीता।
4. 6में बिमस्टेक शिखर सम्मेलन च हिस्सा लैने लेई श्री मोदी थाईलैंड जाडन।
5. लोकसभा नै अज्ज समुंद्री माल दी आओजाई सरबंधी विधेयक 2024 पास कीता। विधेयक दे प्रावधानें दी भाशा सैटल करियै इसी सखल्ला बनाया जाग।
6. आई.पी.एल क्रिकेट च रायल चैलेंजर्स बेंगलुरु अज्ज चेन्नई सुपर किंग्स कन्नै चेन्नई च मैच खेडूग।

<><><><><><>

Cabinet-Briefing

सरकार नै अज्ज देसै च इलेक्ट्रानिक्स चीजें दे उत्पादन गी बढ़ावा देने ते इलेक्ट्रानिक्स चीजें दी सप्लाई श्रृंखला गी तगड़ा करने लेई इलेक्ट्रानिक्स उपकरण उत्पादन योजना गी मंजूरी दिती। नमीं दिल्ली च मीडिया आहलें गी जानकारी दिंदे होई सूचना प्रसारण मंत्री अश्विनी वैष्णव होरें आखेआ जे पिछले 10एं बरें च इलेक्ट्रानिक्स खेत्तर च जबरदस्त बादा होआ ऐ। उनें इनें बरें च इलेक्ट्रानिक्स उत्पादन 17 प्रतिशत दी सालाना चक्र वृद्धि दर दे स्हाबें 5 गुणा बधेया ऐ जिस्सलै के इलेक्ट्रानिक्स निर्यात च 20 प्रतिशत दा सालाना बादा दिक्खेआ गोआ ऐ। उनें आखेआ जे पिछले

10एं बरें च देसै च इलेक्ट्रानिक्स उत्पादन नै 25 लक्ख रोजगार दे मौके पैदा कीते न ते इलेक्ट्रानिक्स उपकरण उत्पादन योजना लेई 22 ज्हार करोड़ रपे थमां बह माली मदाद दिती जाग। उनें आखेआ जे एहदे नै 91 ज्हार थमां मते प्रतक्ख ते परोक्ष रोजगार दे मौके पैदा होंगन। श्री वैष्णव होरें दस्सेआ जे सरकार नै केंद्री सरकार दे मुलाजमें लेई 2 प्रतिशत महंगाई भत्ता ते पेंशनभोगिएं गी महंगाई राहत देने दी मंजूरी दिती ऐ। उनें आखेआ जे एह इस बरे दी पैहली जनवरी थमां लागू होग।

<><><><><><>

PM-TV9

प्रधानमंत्री नरेन्द्र मोदी होरें अज्ज आखेआ ऐ जे राष्ट्र गी सब्भनें शा पैहले रक्खने दा सिद्धांत हून देसै दी विदेश नीति दा मंत्र बनी गेदा ऐ ते भारत हून छड़ा वैश्विक क्रम च शमूलियत गै नेई करा'रदा सगुआं भविक्ख गी आकार देने ते उसी सुरक्षित बनाने च अपना जोगदान बी देआ करदा ऐ। श्री मोदी होर अज्ज नमीं दिल्ली च इक निजी टीवी चैनल आसेआ आयोजित कार्यक्रम दरान बोला करदे हे। उनें आखेआ जे पैहले भारत दी विदेश नीति सब्भनें थमां छिंडा बनाई रक्खने दी ही पर हून एह नीति हर कुसै कन्नै मिलियै कम्म करने दी ऐ। प्रधानमंत्री होरें आखेआ जे भारत नै इक-छत्तर राज दे बजाय मनुक्ख गी तरजीह दिती ऐ ते भारत नै हर कुसै दी शमूलियत जकीनी बनांदे होई 21मीं सदी दे इक वैश्विक संस्थान दे निर्माण लेई बत्त पदरी कीती ऐ। उनें आखेआ जे भारत हून छड़ा सुक्खनें दा मुख गै नेई ऐ सगुआं एह करियै दस्सने आह्ला मुख बनी गेदा ऐ। अंतराश्ट्री मुद्रा कोष दे आंकड़ें दा हवाला दिंदे होई उनें आखेआ जे अज्ज पूरी दुनिया भारत बक्खी दिक्खा करदी ऐ कीजे छड़े 10एं ब' रें च अपनी जीडीपी दूनी करने आह्ला पूरी दुनिया च भारत गै इक्कला मुख ऐ। उनें आखेआ जे भारत नै 25 करोड़ लोकें गी गरीबी शा बाह आह्नेआ ऐ। प्रधानमंत्री होरें आखेआ जे भारत दे नौजवान हुनरमंद बनै करदे न ते ओहू नमिएं काह्डें दे दौर गी अगगे बधाने दा कम्म करै करदे न। उनें इब्बी आखेआ जे उर्जा संसाधनें दे मसले सने आलमी सतह दिएं होरनें चुनौतिएं कन्नै निब्बडने लेई

दुनिया गी इक-जुट होना लोडचदा ऐ। श्री मोदी होरें अंतराश्ट्री सौर गठबंधन दे महत्वै पर लोऽ पाई ते आखेआ जे एहदा गठन उर्जा मतल्लक संकट दा सामना करने ते इस गल्लै गी जकीनी बनाने लेई लेई कीता गेआ हा जे टिकाउ उर्जा दा लाह लौहके कोला लौहके मुल्ल गी बी थहोऐ। श्री मोदी होरें आखेआ जे इस पैहलकदमी दा सकारात्मक असर आबो-हवा च आवा'रदी तब्दीली उप्पर पौग ते एहदे कन्नै वैश्विक दक्खन दे मुल्लें दि'आं जरूरता पूरी करने च बी मदाद थहोग। उ'नें इब्बी आखेआ जे 100 शा मते मुल्ल पैहले गै इस नेक पैहलकदमी कन्नै जुडी गेदे ना।

<><><><><><>

Myanmar

म्यांमार च अज्ज लगातार भूचालै दे दो झटके महसूस कीते गे। रिक्टर पैमाने पर इंदी तीव्रता 7 अशारिया 7 ते 6 अशारिया 4 नापी गेई। मांडले च प्रतिष्ठित अवा पुल इदावदी दरेया च डिग्गी पेया ते केई ईमारतां ठेही गेइयां। भूचाल दा केंद्र सागाइंग कश हा। म्यांमार नै नेपीता ते मांडले समेत 6एं इलाकें च आपातकाल दी स्थिति घोषित कीती ऐ। थाईलैंड दी राजधानी बैंकाक च बी तकरीबन 900 किलोमीटर दूर भूचालै दे झटके महसूस कीते गे। भारतीय दूतावास थाई अधिकारिएं कन्नै मिलिये स्थिति दा निरीक्षण करा'रदा ऐ। हूनै तकर भारतीय नागरिकें कन्नै जुडी दी कुसै बी माडी घटना दी सूचना नेई थहोई ऐ। इक सोशल मीडिया पोस्ट च भारतीय दूतावास नै थाईलैंड च भारतीय नागरिकें गी कुसै बी आपात स्थिति च आपातकालन नम्बर 66618819218 पर संपर्क करने दी सलाह दित्ती ऐ। बैंकाक च भारती दूतावास ते चिंपांग माई च वाणिज्य दूतावास दे सब्बै सदस्य सुरक्षित ना मीडिया रिपोर्टें मूजब थाई रक्षा मंत्री होरें दस्सेआ जे भूचाल च नमिएं बना'रदिएं ईमारतें दे ढौने करी 90 लोक लापता न ते 3 दी मौत होई गेई ऐ। बैंकाक च अगले हफ्ते बिम्सटेक शिखर सम्मेलन दा आयोजन होना ऐ। इस सम्मेलन च प्रधानमंत्री नरेंद्र मोदी होरें बी शामिल होना ऐ।

<><><><><><>

PM-Earthquake Myanmar

प्रधानमंत्री नरेंद्र मोदी होरें अज्ज म्यंमार ते थाईलैंड च आए दे भूंचाल गी लेइयै चिंता बुज्झी ऐ। इक सोशल मीडिया पोस्ट च री मोदी होरें म्यंमार ते थाईलैंड दे नागरिकें दी सुरक्षा ते कल्याण लेई प्रार्थना कीती। उनें आखेआ जे भारत हर मुमकन सहायता देने लेई तैयार ऐ ते विदेश मंत्रालय गी म्यांमार ते थाईलैंड सरकारें दे संपर्क च रौहने लेई आखेआ ऐ।

<><><><><><>

PM-Thailand

प्रधानमंत्री नरेंद्र मोदी 6में बिमस्टेक शिखर सम्मेलन च हिस्सा लैने लेई थाईलैंड दे दऊं दिनें दे दौरै लेई 3 अप्रैल गी बैंकाक जांगन। शिखर सम्मेलन दा विषे ऐ बिमस्टेक खुशहाल, लचीला ते मुक्त। अज्ज दपैहरी मगरा मीडिया आहलें कन्नै गल्ल करदे होई सचिव (पूर्व) जयदीप मजूमदार होरें दस्सेआ जे एहू प्रधानमंत्री हुंदा थाईलैंड दा त्रीया दौरा होगा। नवंबर 2019 च श्री मोदी होरें थाईलैंड च गै एशियन ते पूर्व एशिया शिखर वार्ता च हिस्सा लैता हा। एहदे शा पैहले प्रधानमंत्री होरें नवंबर 2016 च स्वर्गीय बादशाह रामा 9 गी श्रद्धांजलि देने लेई बैंकाक रस्तेयां गै टोक्यो गे हे। सचिव होरें दस्सेआ जे भारत थाईलैंड दे दपकख्या सरबंध बडे निगो न ते दमै मुख्य संस्कृति, परम्परा ते धार्मिक सांझ रखदे न।

<><><><><><>

Carriage- Bill

लोकसभा नै अज्ज समुंद्रीमाल दी आओजाई सरबंधी विधेयक 2024 ध्वनिमत कन्नै पास करी दित्ता। एहू विधेयक भारतीय समुंद्री माल परिवहन अधिनियम 1925 दी थाहर लैगा। एहू कनून समुंद्री दे रस्तेयां माल समेयान दी ढोआई दे सरबंधै च ज्हाजें कन्नै जुडी दिएं जिम्मेदारिएं, देनदारियें, अधिकारें ते प्रतिरखा दा प्रावधान करदा ऐ। एहदे कन्नै गै एहू केंद्र सरकार गी विधेयक दे प्रावधान लागू करने लेई निर्देश जारी करने दा अधिकारी बी दिंदा ऐ। विधेयक पर चर्चा दा परता दिंदे होई केंद्री

बंदरगाह, पोत परिवहन ते जलमार्ग मंत्री सर्बानन्द सोनोवाल होरें आखेआ जे विधेयक दा मुख मकसद अधिनियम दी भावना गी बदले बिजन एहदे प्रावधानें गी सखल्ला ते सैहल बनाना ऐ।

<><><><><><>

Health-Minister

केंद्री सेहत मंत्री जगत प्रकाश नड्डा होरें अज्ज आखेआ जे इस बरै पैहली मार्च तगर आयुष्मान भारत प्रधानमंत्री जन आरोग्य योजना तैहत 8 करोड 9 लक्ख थमां मते अस्पतालें च भर्ती होने दी इजाजत दिती गेई। श्री नड्डा होरें लोकसभा च इक परते च आखेआ जे आशा कार्यकर्ताएं लेई हूनै तगर 10 लक्ख थमां मते आयुष्मान कार्ड ते आंगनवाडी कार्यकर्ताएं लेई 14 लक्ख थमां मते कार्ड बनाए गेन। उनें आखेआ जे इस योजना तैहत 13 ज्हार 866 निजी अस्पतालें ते 17 ज्हार 91 सरकारी अस्पतालें समेत कुल 30 ज्हार 957एं अस्पतालें गी पैनल च रक्खेआ गेआ ऐ। श्री नड्डा होरें दस्सेआ जे 2024-25 आहले बरे लेई आयुष्मान भारत प्रधानमंत्री जन आरोग्य योजना तैहत 34 ज्हार 954 करोड रुपें दे 2 करोड 21 लक्ख शा मते अस्पतालें च भर्ती होने दी इजाजत दिती गेई ऐ।

<><><><><><>

Punjab Budget

स्पीकर कुलतार सिंह सांघवान होरें अज्ज दपैहरी मगरा पंजाब विधानसभा दा बजट सत्र अनमित्थे समें लेई स्थगित करी दित्ता। एह इजलास 21 मार्च गी शुरू होआ हा ते 26 मार्च गी राज्य दे खजाना मंत्री हरपाल सिंह चीमा हुंदे आसेआ 2025-26 बरे आहला बजट पेश कीता गेआ हा। अज्ज सोआल जवाब सत्र आयोजित कीता गेआ ते बक्ख-बक्ख मंत्रिं आसेआ केई रिपोर्टां पेश कीतियां गेइयां जिनेंगी सदन नै पास करी दित्ता।

<><><><><><>

Supreme-Court

उच्चतम अदालतै अज्ज दिल्ली हाईकोर्ट दे साबका जस्टिस यशवंत वर्मा खिलाफ उंदी सरकारी कोठी पर अवैध नकदी थहोने दे दोषै च एफ.आई.आर दर्ज करने दी मंग आहली याचिका खारिज करी दित्ती ऐ। न्यामूर्ति वर्मा हुंदे कोठी च अगग लग्गने दी घटना मगरा नकदी दियां बोरियां बरामद कीतिआं गेइयां हियां। न्यामूर्ति अभय ओका ते न्यामूर्ति उज्जवल मुयान दी पीठ नै याचिका पर सुनवाई करने गी आखेआ। पीठ नै आखेआ जेकर आतंकरिक जांच च यशवंत वर्मा गी दोषी पाया जंदा ऐ तां मुख न्याधीश कश प्राथमिकी दई कराने जां सरकार अगगे उनेंगी हटाने दी सिफारिश करने दा विकल्प होगा।

<><><><><><>

IPL

आई.पी.एल क्रिकेट तैहत अज्ज चेन्नई च रायल चैलेंजर्स बेंगलुरु दा मुकाबला चेन्नई सुपर किंग्स कन्नै होगा। मैच संझा साड्डे 7 बजे रम्भ होगा। पिछले मैच च चेन्नई नै मुम्बई इंडियन्स गी ते बेंगलुरु नै इसले दे चैंपियन कोलकाता नाइट राइडर्स गी 7एं विकटें कन्नै हराया। अज्ज होने आहले मैच च चेन्नई सुपर किंग्स नै टास जित्तेआ ते उनें पैहले गेंदबाजी करने दा निर्णय लैता।

<><><><><><>

EAM-Pakistan

विदेश मंत्री डॉ. एस जयशंकर होरें अज्ज लोकसभा च बोलदे होई पाकिस्तान ते बांगलादेश च अल्पसंख्यकें पर हमलें दी सख्त निंदेआ कीती। उनें सदन गी दस्सेआ जे इस बरे फरवरी म्हीने पाकिस्तान च हिंदू समुदाय दे खलाफ जुल्में ज्यादतिएं दे 10 मामले सामने आए न जिंदे च अगुवा करने ते जबरदस्ती धर्म बदलवाने दे मामले शामिल ना। उनें दस्सेआ जे बांगलादेश च बरे 2024 च अल्पसंख्यकें पर हमलें कन्नै सरबंधत 2 ज्हार 400 घटनां पेश आइयां ते 2025 च ऐसी घटनाएं दी गिनतरी अजें 72 ऐ। एह पुच्छे जाने पर जे क्या भारत एहदे पर कोई कार्रवाई करग तां जयशंकर होरें आखेआ जे भारत नै इनें मामलें पर नेडमी तक्क रक्खी दी ऐ ते इनेंगी भारत आसेआ आलमी सतह उप्पर पुट्टेआ जंदा ऐ।



Jummah-tul Wida

पवित्र रमजान म्हीने दे अखीरले शुक्रवारें यानि अज्ज जुमात उल विदा दे मौके पर जम्मू-कश्मीर च खरी मती गिनतरी च मुस्लिम समुदाय दे लोकें मकामी मसीतें च जाइयै विशेष प्रार्थना कीतियां। इस मौके पर लोकें शांति, खुशहाली ते एकता लेई दुआ मंगी। एह ध्याड़ा समुदाय गी सशक्त बनाने ते इक-दुए दी मदाद करने दे महत्व गी दर्शादा ऐ।



PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” इस बारी 30 मार्च गी देश विदेश च रौहने आले श्रोताएं कन्नै बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 120मीं किशत होगा। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहगा। एहदे कन्नो कन्नी एहदा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग। एहदा डोगरी अनुवाद तुस रातीं 8 बजे इक बारी परतियै सुनी सकदे ओ।



Encounter

कठुआ जिले दे दूर-दरेडे जांगली इलाके च होए दे टाक्करे च सुरक्षाबलें 4 आतंकवादिएं गी मारी-मुकाया ऐ जिसले के सुरक्षाबलें दे बी 4 जवान इस दरान शहीद होई गेन। आकाशवाणी दे जम्मू संवाददाता दी रिपोर्ट मूजब, टाकरे आहली थाहरा दे नेडे अज्ज ड्रोन दे राहें इक होर पुलसकर्मी दा शव

Reasi-Search Operation

सुरक्षबलें संदिग्ध गतिविधि दी सूचना मूजब रियासी दे जांगली इलाकें च बड्डे पैमाने पर तपाशी अभियान शुरू करी दिता ऐ। अज्जै थमां शुरू होए दे इस अभियान च कई इकाइयां खेत्तर दी सुरक्षा निश्चित करने आस्तै घने जांगली इलाकें दी सावधानी कन्नै तपाशी करा करदियां न। अधिकारियें निगरानी तेज करी दिती ऐ ते कुसै बी संभावित खतरे दा पता लाने दी कोशिशें च तालमेल कन्नै जत्त कीते जा'रदे न। आसे-पासे दे बसनीकें गी चौकन्ना रौहने ते नेडमें सुरक्षा कर्मियें जां अधिकारियें गी कुसै बी गैर साधारण गतिविधि दी सूचना देने दा आग्रह कीता गेआ ऐ।

<><><><><><>

Dy CM-Security

उपमुखमंत्री सुरिंद्र चौधरी होरें अज्ज आखेआ ऐ जे केंद्र ते जम्मू-कश्मीर दी सरकार प्रदेश च स्थाई रमानदारी यकीनी बनाने लेई किट्टे रलियै कम्म करै करदियां न। उनें खित्ते च सुरक्षा बवस्था तगड़ी बनाने च दौनें सरकारें दे सांझे जत्तें पर लोऽ पाई। उनें आखेआ जे खित्ते दी तरक्की लेई रमानदारी ते स्थिरता अत्त लाजमी न ते दौनें गै प्रशासन, जम्मू-कश्मीर दे लोकें लेई सुरक्षित माहौल कायम करने लेई बचनबद्ध न।

<><><><><><>